

# Kommunit aqunneqarnerat pillugu Inatsisartut inatsisaat

## Kapitali 1

### *Aalajangersakkat nalinginnaasut*

§ 1. Kommunip susassaqrifiini kommunalbestyrelse aqutsisuuvoq.

*Imm. 2.* Kommunalbestyrelsip kommunip aqunneqarnera, taamatuttaaq borgmesterip suliaasaqrifi, pillugit malittarisassat erseqqinnerusut aqutsinermut ileqqoreqqusami aalajangersassavai. Aqutsinermut ileqqoreqqusassamut taamatullu aqutsinermut ileqqoreqqusamut allannguutissatut siunnersuutit kommunalbestyrelsimit minnerpaamik ullunik 14-inik akuttussuseqartumik marloriarlugit suliarineqassapput.

*Imm. 3.* Kommunalbestyrelsip suleriaasissani nammineq aalajangersassavai.

*Imm. 4.* Kommunalbestyrelsip kommunimi aqutsinermut ileqqoreqqusap suleriaasissamilu assingi Naalakkersuisunut nassiutissavai.

*Imm. 5.* Naalakkersuisut aqutsinermut ileqqoreqqusamik nalinginnaasunik aamma suleriaasissamut maleruagassamik suliaqassapput, kommunalbestyrelsimi allatut aalajangersaasoqarsimatinagu malinneqartussaasumik aamma maleruagassat qanoq paasineqarnissaannik nalornisoortoqartillugu tunngavigneqartussanik.

§ 2. Kommunip ilisarnaataa kommunimi pineqartumi oqartussaasut kisimik atugassaraat. Taamaattoq ilisarnaatip atorneqarnissaanut qinnuteqartoqartillugu pinerit tamaasa allat ilisarnaammik atuisinnaanerannut kommunalbestyrelse akuersisinnaavoq. Ilisarnaatip aningaasarsiutitut atorneqarnissaanut akuersineq sullissinermut akitsuutitut akiliuteqarnissaq piumasaqaatinngortinneqarsinnaavoq.

## Kapitali 2

### *Kommunalbestyrelse*

### *Kommunalbestyrelsip katitigaanera allallu*

§ 3. Kommunilbestyrelsit kommune Qeqertalimmi, Qeqqata Kommuniani aamma Kommune Kujallermi tamarmik 15-inik ilaasortaqaassapput. Avannaata Kommuniani kommunalbestyrelse 17-inik ilaasortaqaarpoq. Kommuneqarfik Sermersuumi kommunalbestyrelse 19-inik ilaasortaqaarpoq.

*Imm. 2.* Ileqquusumik kommunalbestyrelsinut qinersisoqassatillugu kommunalbestyrelsit qinersinissaq

sioqqullugu kingusinnerpaamik ukiup siuliata naannginnerani aalajangiisinnaap-put kommune Qeqertalimmi, Qeqqata Kommuniani aamma Kommuni Kujallermi ilaasortat 15-init ikinnerusinnaasut, Avannaata kommuniani 17-init ikinnerusinnaasut aamma Kommuneqarfik Sermersuumi 19-init ikinnerusinnaasut. Ilaasortat amerlassusissaat akunnattuusussaq aqutsinermut malittarisassani aalajangersarneqassaaq.

**§ 4.** Kommunalbestyrelsiusimasoq tunuarnerata kingorna kommunalbestyrelse qinigaarlaaq inissitsiterluni ataatsimiissaaq, siusinnerpaamilli maajip aallaqqaataani. Ataatsimiigiaqqusineq allaganngorlugu kommunalbestyrelsimi sivisunerpaamik ilaasortaasimasumit isumagineqassaaq, sivisunerpaamillu ilaasortaasimasut arlaqarpata, taava taakkua angajullersaannit.

*Imm. 2.* Borgmesterimik qinersisoqareernissaanut kommunalbestyrelsip isumaqatigiinniarnera ilaasortamit ataatsimiigiaqqusisimasumit isumagineqassaaq, imaluunniit taanna peqanngippat sivisunerpaamik ilaasortaasimasumit, taakkualu arlaqarpata, angajullersaannit.

**§ 5.** Kommunip allaffissornikkut suliaasaataasa aaqqissuunneqarnissaat aammalu kommunaldirektørimik atorfinitsitsisarneq soraarsitsisarnerlu kommunalbestyrelsip akisussaaffigai.

#### *Borgmesterimik borgmesterillu tullianik qinersineq*

**§ 6.** Kommunalbestyrelsip inissitsiterfiusumik ataatsimiinnermini aallaqqaasiullugu borgmesteri akunnerminit qinissavaa.

*Imm. 2.* Ilaasortat najuuttut taasisut affaannit amerlanerusut qinigassanngortittoq qinerpassuk, qinigassanngortittoq borgmesteritut qinigaassaaq. Qinigassanngortittuni amerlanerussuteqartoqanngippat nutaamik qinersisoqaqqissaaq. Qinersineq taanna amerlanerussuteqavinnermik pilersitsinngippat qinigassanngortittut amerlanernit taaneqartut marluk akornanni pingajussaanik qinersisitsisoqassaaq. Qinersinermi taasinerit naligiissimappata qinersineq makitsinikkut aalajangerneqassaaq.

*Imm. 3.* Borgmesterimik qinersisoqareerpat kommunalbestyrelse akunnermini borgmesterip tullianik qinersissaaq, borgmesterip pisinnaannginnerani kingoraartaasartussamik. Qinersineq borgmesterimik qinersinermi maleruagassat atuuttut naapertorlugit ingerlanneqassaaq, borgmesterinngortumillu qinersineq siulersorneqassalluni imaluunniit taanna pisinnaanngippat ilaasortamit borgmesterimik qinersinermi siulersuisuusimasumit.

*Imm. 4.* Aqutsinermut malittarisassami aalajangersarneqarsinnaavoq kommunalbestyrelse ilaasortami akornanni qinersissasoq borgmesterip tullissaanik siullermik aappaanillu, taaneqartutut tulleriinneqarlutik borgmesterip pisinnaannginnerani kingoraartaasartussanik. § 36, imm. 4. naapertorlugu qanoq amerlassuseqarneq tunngavigalugu qinersineq ingerlanneqassaaq.

*Imm. 5.* Borgmesterimik aamma borgmesterip tullianik qinersineq kommunalbestyrelsip piffissami qinigaaffiani atuutissaaq.

**§ 7.** Kommunalbestyrelsimut ilaasortaq kinaluunniit pisussaavoq borgmesterimut imaluunniit borgmesterip tullianut qinerneqarnerminik akuersissalluni.

*Imm. 2.* Qinnuteqartoqarneratigut kommunalbestyrelsip borgmesteri aamma borgmesterip tullia

piffissap qinigaaffiup sinnerani atuukkunnaarsissinnaavai.

*Imm. 3.* Borgmesteri imaluunniit borgmesterip tullia akuerineqarluni atorfimminiit tunuarpat, toquppat imaluunniit kommunalbestyrelsimit tunuarpat nutaamik qinersineqassaaq malittarisassat § 6-miittut naapertorlugit, kommunalbestyrelsip piffissami qinigaaffiata sinnerani atuuttussamik. Borgmesterip tullii marluk qinerneqarsimappata inissaq inuttaaruttoq kommunalbestyrelsimi gruppimit toqqaasimasunit inuttalerneqassaaq.

*Kommunalbestyrelsip ataatsimiittarneri, suliamut attuumassuteqarnermi aalajangeeqataasinnaannginneq aammalu peqanngittarnej*

**§ 8.** Kommunalbestyrelse aalajangiisassaaq qaqugu sumilu ileqquusumik ataatsimiinnerit ingerlanneqartassanersut. Tamanna kommunimi periaaseq naapertorlugu tamanut tusarliunneqartassaaq ukiut naatsorsuuteqarfiit aallartinneri tamaasa, tamannalu pillugu Naalakkersuisut ilisimatinneqassapput.

*Imm. 2.* Ukiuni kommunalbestyrelsimut nutaamik qinersiffiusussani ileqquusumik ataatsimiinnissat ullusaaq aalajangersarneqartassapput taamaallaat qaammatip kommunalbestyrelsip atuuttup tunuarfissaata naaneranut. Kommunalbestyrelsip qinigaarlaap inissitsiterluni ataatsimiinnermini ukiup sinnerani ileqquusumik ataatsimiittarnissat ullusaaq aalajangersassavai.

*Imm. 3.* Immikkut ittunik ataatsimiinneqartassaaq borgmesterip pisariaqartuutikkaangagu imaluunniit ikinnerpaamik ilaasortat pingajorarterutaasa tamanna piumasarigaangassuk. Borgmesterip aalajangertassavaa immikkut ittunik ataatsimiinnissat qaqugu sumilu pinissaat. Sapinngisamik sioqqutsisumik kommunimi innuttaasut Naalakkersuisullu nalunaarfigineqassapput.

*Imm. 4.* Borgmesterip sapinngisamik kingusinnerpaamik kommunalbestyrelsip ataatsimiilernissaa ulluinnarnik sisamanik sioqqullugu oqaluuserisassat allassimaffiat kommunalbestyrelsimut ilaasortanut nassiuttassavaa, kiisalu sapinngisamik kingusinnerpaamik ataatsimiinnissaq ullunik pingasunik sioqqullugu suliat paasissutissallu oqaluuserisassani suliasat nalilernissaannut atorineqartussat nassiunneqassapput. Kommunalbestyrelsimut ilaasortat inatsisit naapertorlugit nipangiussisimasussaataitanermut maleruagassiat killissarititaasa iluanni suliasat kommunalbestyrelsimi oqaluuserineqartussat inuit kommunalbestyrelsimut ilaasortaangitsut peqatigalugit misissuataarnissaannut pisinnaatitaapput.

*Imm. 5.* Kommunalbestyrelsip ataatsimiinnerani suliasanut oqaluuserineqartussanut takussutissiaq aammalu aalajangiinernut imaqarniliaq, inatsisit naapertorlugit nipangiussisimasussaataitanermut maleruagassiat killissarititaat killigalugit, kommunit illoqarfiini nunaqarfiinilu tamani sumiiffimmi ataatsimi arlalinniluunniit, kiisalu kommunip nittartagaatigut saqqummiunneqassapput.

**§ 9.** Kommunalbestyrelsip ataatsimiinneri tamanut ammasuupput. Taamaattoq kommunalbestyrelsip akuersissutigisinnaavaa suliasat ataasiakkaat matoqqasumik oqaluuserineqarnissaat suliasap qanoq issusia pissutigalugu tamanna pisariaqartinneqaraangat. Suliasap matoqqasumik oqaluuserineqarnissaanut tunngavissaqarneris pillugu apeqqut matoqqasumik oqaluuserineqassaaq tamanna kommunalbestyrelsimit imaluunniit borgmesterimit aalajangerneqarpat.

*Imm. 2.* Kommunalbestyrelsip inuit kommunimi atorfeqartut akuerisinnaavai suliasat matoqqasumik oqaluuserineqarnerat najuuffigisinnaagaat. Suliasap matoqqasumik oqaluuserineqarnerani inuit allat kommunalbestyrelsip aggeqqusinnaavai suliasap nassuiarneqarnissaa pissutigalugu tamanna kissaatiginarpat.

*Imm. 3.* Nipangiussisimasussaataaneq Kalaallit Nunaanni Pinerluttulerinermut inatsit naapertorlugu kommunini matoqqasumik ataatsimiinnerni peqataasunut tamanut atuuppoq.

*Imm. 4.* Naalakkersuisut sinniisaat pisinnaatitaavoq suliassat matoqqasumik oqaluuserineqarneranni najuutissalluni.

**§ 10.** Immikkut allamik aalajangigaqartoqarsimanngippat suliassap akuersissutigineqarnissaani kommunalbestyrelsimi ataasiaannarluni oqaluuserinnineq pisariaqarpoq.

**§ 11.** Kommunalbestyrelse aalajangiisinnaassuseqarpoq ikinnerpaamik ilaasortat affaat ataatsimiinnermi najuuppata. Allamik immikkut aalajangigaqartoqarsimanngippat taasisut amerlanerussuteqarnerisigut aalajangiineqartassaaq.

*Imm. 2.* Ilaasortaq ataatsimiinnermi peqataasinnaavoq oqarasuaatikkut imaluunniit videokonference telefaxiluunniit atorlugu, ilaasortap piumasaqaatit § 15, imm. 1-imi allassimasut naammassisinnaappagit, aammalu sinniisussamik ataatsimiigiaqqusisoqarsinnaappat.

*Imm. 3.* Kommunalbestyrelsip suleriaatsimini aalajangersarsinnaavaa ataatsimiinnerit oqarasuaatikkut videukkulluunniit kiisalu telefaxikkut ingerlanneqarsinnaasut, taamatullu aamma attaveqatigiinnermut periarfissat allat atorineqarsinnaasut.

**§ 12.** Kommunalbestyrelsimut ilaasortaq kinaluunniit qinikkatut sulinerminut atatillugu suliassap aalajangersimasup inaarutaasumik inerneranik kommunip allaffeqarfiani inissisimasumik misissuataarisinnaatitaavoq.

*Imm. 2.* Imm. 1 malillugu suliamik takunnikkumanermik piumasaqaat borgmesterimut ingerlatinneqassaaq.

*Imm. 3.* Borgmesterip suliامت tunngasumik takunnissinnaanerup annertussusissaa killilersinnaavaa, suliap sularineqarnerata tamanna pisariaqartippagu, imaluunniit takunnissinnaatitaaneq pissusissamisuunngitsumik ajornartorsiortitsilersinnaappat.

*Imm. 4.* Kommunalbestyrelsimut ilaasortaq kinaluunniit qinnuteqarnini naapertorlugu suliامت aalajangersimasumut tunngasuni suliap assileneqarnerinik nassinneqarsinnaavoq, imm. 1-3-mi periarfissamik atuinermini. Kommunalbestyrelsili erseqqinnerusunik maleruagassiorsinnaavoq suliامت tunngasunik paasissutissanik nassinneqarsinnaanermut tunngatillugu, tamanna pisariaqartinneqarpat.

**§ 13.** Kommunalbestyrelsimut ilaasortap kialuunniit kommunip susassaarfii pillugit apeqqutit suulluunniit kommunalbestyrelsimut saqqummiussinnaavai aammalu tamakku pillugit aalajangiinissanut siunnersuutininik saqqummiussisinnaalluni. Ataatsimiititaliat borgmesterilu paasissutissanik taassuma piumasaanik, kommunalbestyrelsillu aalajangernissaanut inatsisitigut aalajangersakkat qaqugukkulluunniit malinneqartussaataasut pillugit kommunalbestyrelsimut nalunaaruteqassapput.

**§ 14.** Ilaasortat ilaat suliassami aalajangersimasumi inuttut ima soqutigisaqartiginersoq suliassaq taanna pillugu kommunalbestyrelsip oqaluuserinninnerani taasineranilu peqataanngitsoortariaqarnersoq kommunalbestyrelsip aalajangiiffigissavaa.

*Imm. 2.* Ilaasortap pissutsinik suliassanilu aalajangersimasuni inuttut soqutigisaqarnini pissutigalugu ataatsimiissutiginninnermi taasinernilu peqataasinnaanermut nalornisoornartoqartillugu

kommunalbestyrelse ilisimatissavaa.

*Imm. 3.* Ilaasortaq suliassamut tunngasumi aalajangeeqataasinnaangitsutut oqaatigineqartariaqartoq ilimanarsippat ilaasortat pineqartoq qinigassanngorteqatigalugu qinigaasimasut, aamma kattusseqatigiinnit kisimiillutik qinigassanngortissimasut, piumasarisinnaavaat suliassap oqaluuserineqarnissaani pineqartup sinniisussaata peqataatinneqarnissaa.

*Imm. 4.* Kommunalbestyrelse aalajangiissappat ilaasortaq suliassamut attuumassuteqarluni aalajangeeqataasinnaangitsoq, taassumalu sinniisussaa ataatsimiigiaqquneqanngippat, ilaasortat pineqartumut qinigassanngorteqataasimasut, pineqartorlu kisimiilluni qinigassanngortittuusimappat ilaasortap nammineq piumasarisinnaavaa suliassap tullianik ataatsimiinnissamut kinguartinneqarnissaa. Taamaattoq kinguartitsisoqarsinnaangilaq ilaasortat najuuttut 2/3-sa tamanna akerlerippassuk, imaluunniit kinguartitsinissap nassatarissappagu piffissarititaasut kommunip malissallugit pisussaaffii qaangerneqassappata.

**§ 15.** Ilaasortaq kommunalbestyrelsip ataatsimiinnissaani napparsimanini, naartunini, erninini, meeravissartaarnini, inuiaqatigiinni sullissisussaatailluni pisussaaffiligaanini, inuutissarsiutini assigisaalluunniit pissutigalugit ataatsimeeqataasinnaajunnaarpat ilaasortap pisinnaangitsup qinigaatigisimasaasa, aamma kattusseqatigiinnit kisimiillutik qinigassanngortissimasut, piumasarisinnaavaat sinniisussap ataatsimiigiaqquneqarnissaa. Inissitsiterfiusumik ataatsimiinnermi, imaluunniit aningaasartuutissanut missingersuutit aappassaaneer neqarnerannut atatillugu, sinniisussap ataatsimiigiaqquneqarnissaa piumasarineqarsinnaavoq allamik peqquteqarluni ilaasortaq ataatsimeeqataasinnaangippat. Qinigassanngorteqatigiinni ilaasortamik qinikkamik ataatsimiigiaqqusinnissamik piumasaqaateqartoqarsinnaangippat sinniisussap nammineq piumasaqaatigisinnaavaa ataatsimiigiaqquneqarnissani.

*Imm. 2.* Kommunalbestyrelsimut ilaasortaq imm. 1-imi taagorneqartuni pissuteqarluni qaammatit marluk sinnerlugit suliassanik isumagisaqarnissamik pisinnaangitsoq, kommunalbestyrelsimut ilaasortaq akissaateqarani sulinngiffeqarallarnissamik qinnuteqassaaq, taamaattorli tak. § 56, imm. 8. Sulinngiffeqarallarnissamik qinnuteqaat borgmesterimut nassiunneqassaaq, qinnuteqaallu imaqaassaaq pissutaasutut tunuliaqutaasoo pillugu paasissutissamik aamma taamatut pisinnaanginnermut pissutaasup qanoq sivilutiginissaa naatsorsuutigineqarnersoq. Qinnuteqarnermut atatillugu uppersaaitit pisariaqartut qinnuteqaammut ilaatinneqassapput imaluunniit borgmesterip taakkuninnga noqqaassuteqarneratigut nassiunneqassapput. Borgmesterip sinniisussaq kommunalbestyrelsip ataatsimiinnissaanut tuliuttumut siullermut ataatsimiigiaqqussavaa.

*Imm. 3.* Kommunalbestyrelsip aalajangissavaa ilaasortap sulinngiffeqarallarnissannik qinuteqaataani aamma sinniisussap isernissaanut piumasaqaataasut eqqortinneqarnersut.

*Imm. 4.* Ilaasortap kommunimi pisussaaffini suliareqqissinnaalerpagit sinniisussaq kommunalbestyrelsimut tunuassaaq.

*Imm. 5.* Borgmesterip imaluunniit borgmesterip tulliatat sinniisussaa imm. 2-mi maleruagassat naapertorlugit isertinneqarpat, pineqartullu pisinnaangikkallarnera sivilinnerpaamik qaammatinik sisamanik sivilussuseqarpat § 6-imi maleruagassat malillugit kommunalbestyrelsip toqqaassavaa borgmesteritut imaluunniit borgmesterip tulliatut isumagissannik isumaginnittussaq.

**§ 16.** Kommunalbestyrelsip aalajangiineri allanneqassapput aalajangiinernut imaqarniliami ataatsimiinnerit kingornatigut ilaasortanit ataatsimiinnermi najuuttunit atsiorneqartussami. Ilaasortani taakkunani kinaluunniit piumasaqarsinnaavoq isummani allaasoq naatsumik imaqarniliami allanneqaqqullugu, sulianilu pisortatut oqartussaasunut allanut ingerlateqqitassani piumasarisinnaallugu taassuma aamma imaqarniliap imaanik ilisimatinneqarnissaat. Ilaasortap taassuma suliap nassiunneqarnerani suliaq ilaqartissinnaavaa nammineq isummaminut tunngavilersuutigisaminik.

*Imm. 2.* Borgmesterip isumannaassavaa aalajangiinernut imaqarniliap ataatsimiinnermi peqataasunit atsiorneqarnissaa, aamma matoqqasumik ataatsimiinnermi aalajangiiffigineqartut ilanngullugit.

*Imm. 3.* Ilaasortat § 11, imm. 2 naapertorlugu peqataasut atsiorsinnaapput attaveqatigiinnermi teknologii atorlugu.

*Imm. 4.* Imaqarniliap atsiorneqarnerata kingorna kingusinnerpaamik qaammatip ataatsip qaangiunnerani imaqarniliap nuutinnera borgmesterip Naalakkersuisunut nassiutissavaa.

### **Kapitali 3**

#### *Borgmesterip borgmesterillu tulliaata sulinerat*

**§ 17.** Borgmesterip kommunalbestyrelsip ataatsimiinnissai piareersartassavai kommunalbestyrelsimilu ilaasortat ataatsimiigiaqqusarlugit. Borgmesterip kommunalbestyrelsip ataatsimiinneri taasinerilu siulersortassavai aalajangiisarnerrillu imaqarnilianut allattaavinnut allanneqarnissaat isumagissallugu.

**§ 18.** Borgmesterip kommunalbestyrelse sinnerlugu suliassat kinguartinneqarsinnaanngitsut imaluunniit nalornisoorutaasinnaanngitsut aalajangiivigisinnaavai.

*Imm. 2.* Borgmesterip kingusinnerpaamik ileqqusumik ataatsimiinnermi tulluuttumi suliat imm. 1 naapertorlugu aalajangiiffigineqartut pillugit kommunalbestyrelse ilisimatittassavaa.

**§ 19.** Borgmesterip kommunip ulluinnarni allaffissornikkut aquunneqarnera isumagissavaa, suliassat ataatsimiititalianut ataavartunut ingerlateqqittarlugit, kiisalu suliassat kommunalbestyrelsimit aalajangiiffigisariaqartut aalajangiiffigineqarnissaannut naammattumik qulaajarneqarsimanissaat isumagisarlugu. Borgmesterip suliat sularineqarnerat nakkutigissavaa, pisariaqartumillu ilitersuusiornissat aaqqissuutissallugu.

*Imm. 2.* Borgmesterip isumagissavaa aningaasartuuteqartoqaranilu isertitaqartoqassanngitsoq pisariaqartumik akuersisummik peqartoqartinnagu.

**§ 20.** Borgmesteri ilaasortaannikkaluarluni ataatsimiititaliat ataavartut il.il. isumaqatigiinniarnearanni peqataasinnaavoq, taaseqataasinnaanani. Borgmesteri ataatsimiititaliat qaqugu ataatsimiinnissaannik oqaluuserisassallu allassimaffiannik ilisimatinneqartassaaq, aamma ataatsimiinnerit tamarmik imaqarniliorneqarnerata assinganik.

*Imm. 2.* Borgmesterip ataatsimiititaliat marluk amerlanerilluunniit ilaasortaat katersortissinnaavai, suliassani ataatsimut soqutiginaateqartuni oqaloqatigiissuteqarnissaaq siunertarlugu.

*Imm. 3.* Borgmesterip suliaq ataatsimiititaliap suliassaqaqfiata iluani suliaasoq unitsissinnaavaa, ataatsimiititaliarlu peqqullugu suliaq kinguarsarneqarani kommunalbestyrelsimut saqqummiunneqassasoq.

**§ 21.** Kommunip pigisanik aalaakkaasunik pisineranut tunisineranut, taarsigassarsineranut aammalu qularnaveeqqusiisutut imminut pisussanngortinneri pillugit pappiaqqat borgmesterimit imaluunniit borgmesterip tullianit aammalu inummit kommunalbestyrelsimit piginnaatinneqartumit atsiorneqartassapput.

**§ 22.** Suliassat inatsit manna kommunimilu aqutsinermi malittarisassat naapertorlugit borgmesterimut isumagisassanngortinneqartut borgmesterip pisinnaannginnerani borgmesterip tullia kingoraartaagallarnermi isumagisarilissavai.

*Imm. 2.* Borgmesterip tullia kommunalbestyrelsimiit pisussaatinneqarsinnaavoq borgmesterimut paarlataanissaminut, nalilerneqarpat borgmesteri periarfissaqassanngitsoq akisussaaffimminik minnerpaamik qaammatip ulluini 21-ni ingerlatsinissaminut.

**§ 23.** Borgmesteri Inatsisartut inatsisaat una naapertorlugu imaluunniit kommunimi aqutsinermit ileqqoreqqusaq imaluunniit suleriaasissamut maleruaqqusaq naapertorlugit suliassaminik pisussaaffigisaminik suliaqarnissaminut itigartitsippat kommunalbestyrelsip borgmesterip tullia peqqusinnaavaa suliassamik pineqartumik isumaginissasoq.

*Imm. 2.* Borgmesterip imm. 1-imi suliassanik pineqartunik suliaqarnissaminut ingasattumik arlaleriarluniluunniit ilaginnaaneratigut, kommunalbestyrelse borgmesteri soraarsinniarlugu aalajangiisinnaavoq. Tamatuma kingorna aalajangiinerup atuuttussanngortinneqarnissaata tungaanut borgmesterip tullia borgmesteritut sulissaaq.

*Imm. 3.* Kommunilbestyrelsip borgmesterip soraarsinneqarnissaanik aalajangernera ingerlaannartumik akuersissutigisassanngorlugu Nakkutilliisoqarfimmut nalunaarutigineqassaaq. Aalajangerneq aatsaat atuutilissaaq, Nakkutilliisoqarfimmiit atortussanngortinneqareeruni.

*Imm. 4.* Aalajangerneq imm. 3 naapertorlugu ingerlanneqartoq eqqartuussivinnut suliassanngortinneqarsinnaanngilaq.

## **Kapitali 4**

### *Ataatsimiititaliat ilaalu ilanngullugit*

#### *Aningaasaqarnermut ataatsimiititaliaq*

**§ 24.** Kommunimi suliassaatit isumagineqarnissaat siunertaralugu kommunalbestyrelse aningaasaqarnermut ataatsimiititaliamik pilersitsissaaq.

*Imm. 2.* Borgmesteri aningaasaqarnermut ataatsimiititaliami siulittaasuvoq. Ilaasortat sinneri kommunalbestyrelsimut ilaasortat akornannit qinerneqassapput.

*Imm. 3.* Aningaasaqarnermut ataatsimiititaliami ilaasortat akunnattumik amerlassuseqassapput aamma kommunalbestyrelsimut ilaasortat affaat qaangersimassanngilaat. Ilaasortanut tamanut, taamaallaat borgmesteri pinnagu, sinniisussanik qinersisoqassaaq, taakkualu ilaasortaasut najuussinnaannginneranni ataatsimeeqataasinnaanngorlugit ataatsimiigiaqquneqartassapput.

*Imm. 4.* Aningaasaqarnermut ataatsimiititaliami ilaasortassanik qinersisoqartassaaq borgmesterimik

borgmesterillu tullianik (borgmesterip tulliinik) qinersisoqareernerani. Qinigaaneq kommunalbestyrelsip piffissamut qinigaaffianut atuuppoq.

**§ 25.** Aningaasaqarnermut ataatsimiititaliap suliassai tassaapput:

- 1) Kommunip iluani suliassaqarfinni tamani aningaasaqarnikkut allaffissornikkullu ingerlatsinerminakkutilliisuuneq. Suliani taakkunani aningaasaqarnermut ataatsimiititaliap oqaaseqaataa piumaneqartassaaq, suliap kommunalbestyrelsimut aalajangiiffisassanngorlugu saqqummiunneqannginnerani.
- 2) Akissarsianut sulisoqarnermullu tunngasuni suliassanik tamakkiisumik isumaginninneq, tassunga ilaallutik kommunimi sulisorisanik atorfinittisarneq soraarsittisarnerlu, taamaallaat kommunaldirektørimik atorfinittisarneq soraarsittisarnerlu pinnagit, suliap taanna kommunalbestyrelsimut isumagineqartussaammat.
- 3) Suliap kommunip aningaasaqarneranut naatsorsuuserineranullu attuumassuteqartut.
- 4) Aningaasaqarnermik pilersaarusernermut, ataatsimiititaliat ataavartut kommunalbestyrelsimut inassuteqartarnerannut pituttuisunik, nalinginnaasumik tunngavissiorneq
- 5) Aningaasaqarnermut ataatsimiititaliap isumagissavaa ataqatigiissaassalluguluunniit kommunip immikkoortunut pilersaaruserinera, ataatsimut atorineqartussanik pilersaarusernermut maleruagassiornermigut paasissutissallu qanoq annertussuseqarnissaannut aalajangersaanermigut.

*Imm. 2.* Aningaasaqarnermut ataatsimiititaliap aamma kommunip ingerlatsiviisa allat aqunneqarnerat isumagisarissinnaavaa. Kommunip ingerlatsiviisa allat aqunneqarnerannik aningaasaqarnermut ataatsimiititaliap isumaginnittuussappat, aqutsinermit maleruagassani aalajangersarneqarsinnaavoq aningaasaqarnermut ataatsimiititaliap suliassat naapertorlugit taaguuteqartinneqassasoq.

*Imm. 3.* Kommunalbestyrelsimut ilaasortat aningaasaqarnermut ataatsimiititaliami ilaasortaanngitsut pisinnaatitaapput ataatsimiititaliap ukiumut pilersaaruserifusumut missingersuuserifusunullu aningaasartuutissanut missingersuusiaasa inaarutaasumik suliarineqarneranni oqaaseqarsinnaanatik peqataanissaminut.

*Imm. 4.* Aalajangiinnermut imaqarniliat § 16 naapertorlugu maleruagassat aningaasaqarnermut ataatsimiititaliat sulineranni malinneqassapput. Aalajangiinnermut imaqarniliap ataatsimiinnermi peqataasunit atsiorneqarnissaa Naalakkersuisunullu nassiunneqarnissaa borgmesterip qulakkiissavaa.

*Ataatsimiititaliat ataavartut*

**§ 26.** Kommunilbestyrelse aammattaaq ataatsimiititalianik ataavartunik pilersittissinnaavoq, taakkualu katitigaanissaat suliassaallu aqutsinermit ileqqoreqqusami aalajangersarneqassaaq.

*Imm. 2.* Ataatsimiititaliani ataavartuni ilaasortat akunnattumik amerlassuseqassapput, taakkulu kommunalbestyrelsillu ilaasortaasa affaanit amerlanerusinnaanngillat. Ataatsimiititaliani ataavartuni ilaasortat kommunalbestyrelsimut ilaasortat akornanni qinerneqassapput, aammalu ilaasortat tamarmik immikkut sinniisissaannik, ataatsimiititaliami ilaasortanik nalinginnaasunik ilaajunnaartoqartillugu ataatsimiititaliamut ataatsimiigartussatut aggersarneqarsinnaasunik toqqaasoqassaaq.

*Imm. 3.* Ataatsimiititalianut ataavartunut ilaasortassanik qinersineq aningaasaqarnermut ataatsimiititaliamik qinersereernerup kingorna ingerlanneqartassaaq. Qinigaaneq kommunalbestyrelsip piffissamut qinigaaffianut atuuppoq.



**§ 27.** Ataatsimiititaliat ataavartut siulittaasussatik namminneq qinertassavaat. Ataatsimiititaliami ataavartumi ilaasortaq kinaluunniit pisussaavoq siulittaasutut qinigaanini akuerissallugu.

Ataatsimiititaliami siulittaasup ataatsimiititaliap ataavartut ataatsimiinnissai piareersartassavai, ataatsimiigiaqqusisassalluni ataatsimiinnerit siulersortassallugit ataatsimiinnernilu aalajangiinerit aalajangiinernut imaqarniliat allanneqarnissaat akisussaaffigalugu.

*Imm. 2.* Siulittaasup ataatsimiititaliaq sinnerlugu suliassat kinguartinneqarsinnaanngitsut imaluunniit nalornisoorutaasinnaanngitsut aalajangiivigisinnaavai. Suliassani inatsisiliornikkut ataatsimiititaliamut suliassanngortitaasimanngitsuni kinguartinneqarsinnaanngitsunili ataatsimiititaliami siulittaasup aalajangiitinnani borgmesteri ilisimatittassavaa.

*Imm. 3.* Ataatsimiititaliami ilaasortap kinaluunniit siulittaasup sulinera pillugu apeqquutit suugaluartulluunniit ataatsimiititaliamut suliassanngortissinnaavai, siulittaasullu ataatsimiititaliaq nassuiaatinik piumasaanik nalunaarfigissavaa. Siulittaasoq sutigut tamatigut ataatsimiititaliap aalajangiinerinut maleruuttussaavoq.

**§ 28.** Ataatsimiititaliat ataavartut sulinertik ataatsimiinnerminni ingerlattassavaat. Ataatsimiititaliat ataavartut aalajangiisinnaassuseqartarput ilaasortat minnerpaamik affaat ataatsimiinnermi peqataagaangata. Ataatsimiititaliat ataavartut ilaasortamit piumasaqartoqarnera tunngavigalugu aalajangersinnaapput ilaasortaq nalunaarasuartaatitigut attaveqatigiinnermut atortut atorlugit ataatsimiinnermi peqataasinnaappat.

*Imm. 2.* Ataatsimiititaliat ataavartut sulinerminni suleriaasissatut maleruagassartik namminneq aalajangersartarpaat.

*Imm. 3.* § 16 naapertorlugu aalajangiinernik imaqarniliat pillugit malittarisassat, taamatuttaaq ataatsimiititalianut ataavartunut atuutissapput. Ataatsimiititaliani ataavartuni siulittaasut isumannaartassavaat aalajangiinernut imaqarniliat ataatsimeeqataasunit atsiorneqartarnissaat, Naalakkersuisunullu nassiunneqarnissaat.

*Imm. 4.* Ataatsimiititaliani ataavartuni allattoqarnikkut suliassat isumagineqarnissaat siunertaralugu inuit kommunimi atorfeqartinneqartut ataatsimiititaliat ataavartut ataatsimiinnerinut najuussinnaapput. Ataatsimiititaliani ataavartuni aalajangerneqarsinnaavoq inuit allat, tassunga ilanngullugit kommunalbestyrelsimut ilaasortat ataatsimiititaliap isumaqatigiinniarnani alaatsinaattuusinnaasut, tamanna kissaatigineqarpat suliap ersarissaavigineqarnissaanut atatillugu.

*Imm. 5.* Kommunalbestyrelsimut ilaasortaq kinaluunniit, nipangiussisimasussaataaneq pillugu inatsisiliornikkut maleruagassat killissarititaat killigalugit, qinnuteqareernermigut pisinnaatitaavoq oqaluuserisassat allattorsimaffiinik aamma aalajangiinernut imaqarniliat allattorsimaffiinik ataatsimiititaliani ilaasortaaffiginngisaraluamini ilaasortaanut nassiunneqartartunik, aammalu qinnuteqareernikkut ataasiakkaatigut suliassanut tunngasunik ataatsimiititaliami ilaasortanut nassiunneqartut assigisaannik nassinneqarnissaminut.

**§ 29.** Ataatsimiititaliat ataavartut suliassaraat imminnut suliakkiissutigineqartut ukiumoortumik aningaasanut missingersuusiap akuerineqarsimasup iluani aammalu kommunalbestyrelsip akuersissutigisimasai allat naapertorlugit. Ataatsimiititaliat ataavartut aningaasanik atuinerit aningaasat akuerineqarsimasunit nikingannginnissaat nakkutigissavaat aammalu aningaasaqarnermut

ataatsimiititaliaq aqqutigalugu kommunalbestyrelsimut siunnersuuteqassallutik aningaasat ilassutissatut akuersissutissat kissaatiginartutut pisariaqartutulluunniit isumaqarfiginarpata.

*Imm. 2.* Iliuusissat ataatsimiititaliamut allamut annertuumik pingaaruteqartut aallartinneqannginneranni ataatsimiititaliap ataavartup pisariaqartitsineq tunngavigalugu borgmesteri akuutilugu, tak. § 20, imm. 2, ataatsimiititaliaq pineqartoq isumaqatiginiassavaa.

*Imm. 3.* Ataatsimiititaliat ataavartut aningaasaqarnermut ataatsimiititaliamit piumaffigineqarlutik ataatsimiititaliallu taassuma piffissaliussaata iluani ukiumoortumik aningaasanut missingersuusiassamut aammalu ukiunut tulliinut arlalinnut aningaasanut missingersuusiat ilanngutassatik saqqummiutissavaat.

**§ 30.** Ataatsimiititaliami ilaasortap kialuunniit aalajangiinerup piviusunngortinneqarnissaa unitsissinnaavaa ataatsimiinnermi oqaaseqaruni suliaassap kommunalbestyrelsimut tamarmiusumut saqqummiunneqarnissaa kissaatigigini.

#### *Ataatsimiititaliat, isumalioqatigiissitat il.il*

**§ 31.** Ataatsimiititalianut, isumalioqatigiissitanut, siulersuisunut taamaaqataannullu kommunalbestyrelsip aalajangersakkat allat naapertorlugit sinniisoqarfigisassaanut ilaasortassat kommunalbestyrelsip qinissavai.

*Imm. 2.* Ataatsimiititalianut il.il. ilaasortassanik qinersineq ataatsimiititalianut ataavartunut qinersinerup kingorna ingerlanneqartassaaq. Qinigaaneq kommunalbestyrelsip piffissamut qinigaaffianut atuuppoq.

*Imm. 3.* Kommunalebestyrelsip aalajangiussinnaavaa ataatsimiititaliani il.il. imm. 1-imi taaneqartuni kommunalbestyrelsimi ilaasortaanngitsunik sinniisunik allanik toqqaasoqarnissaa, inatsisini allani immikkut ittumik taamaaliorsinnaatitsisoqarpat aamma suliaassanik allanik isumaginittitoqarsinnaatitaappat, kommunalebestyrelsimut suliaassatut tunniussanik.

**§ 32.** Kommunalebestyrelse kommunerisami illoqarfinnut tamanut najukkami ataatsimiititaliamik pilersitsissaaq.

*Imm. 2.* Kommunalebestyrelse najukkami ataatsimiititalianut qinersinissaq pillugu maleruagassiussaaq, aamma aalajangissavaa qanoq annertutigisumik peqatigiiffiit, matumanilu politikikkut partiit aamma katusseqatigiit imaluunniit allat qanoq aalajangiitigisinnaassanersut, najukkami ataatsimiititaliamut ilaasortassatut kikkut qiningassanngortissallugit imaluunniit kikkut najukkami ataatsimiititaliap ataatsimiinneranut alaatsinaattutut peqataasinnaassanersut innersuutissallugit.

*Imm. 3.* Najukkani ataatsimiititaliat kommunalebestyrelsip suliaakkiineratigut aalajangersimasunik suliaqartarsinnaapput.

*Imm. 4.* Kommunalebestyrelse aningaasanik atugassanngortitsissaaq najukkani ataatsimiititaliat atorsinnaasaannik. Aningaasat tamanik tusarniaanernut, kultureqarnermut, timersornermut inuiaqatigiinnilu sulissutigineqartunut atorneqartassapput.

*Imm. 5.* Najukkani ataatsimiititaliat kommunalebestyrelsimut, aningaasaqarnermut ataatsimiititaliamut imaluunniit ataatsimiititalianut ataavartunut siunnersuisartuusinnaapput.

*Imm. 6.* Kommunalebestyrelse najukkani ataatsimiititaliat sulinerannut malittarisassanik aalajangersaassaaq, taamatuttaaq imaqarniliortartussaataaneq, naatsorsuusiortussaataaneq aamma missingersuutitut tunngatillugu atugassanngortitsinernik akuersissuteqartarnerit pillugit.

*Imm. 7.* Najukkami ataatsimiititaliami ilaasortanut, kommunalbestyrelsimut ilaasortaanngitsunut, kommunalbestyrelse aalajangersimasumik angissusilikkamik aningaasarsiaqartitsisinnaavoq. Aningaasarsiaritinneqartussat tunniunneqarsinnaapput Naalakkersuisut aalajangersagaat tak. § 56, imm. 6 malillugu amerlanerpaaffiliussat sippornagit.

*Imm. 8.* Kommunalebestyrelsimut, aningaasaqarnermut ataatsimiititaliami imaluunniit ataatsimiititaliani ataavartuni suliasat suliarineqarnerannut atatillugu immikkut ilisimasaqartut aamma paasisimasallit imaluunniit immikkut ittunik soqutigisallit ilaatinneqartarnissaat siunertaralugu kommunalbestyrelse ataatsimiititalianik immikkut ittunik pilersitsisinnaavoq.

*Imm. 9.* Ataatsimiititaliat imm. 1-imi aamma 8-imi taaneqartut kommunalbestyrelsip atuuffissaata iluani piffissami aalajangersimaqqissaartumi atuuttussanngorlugit qanorluunniit ilinikkut pilersinneqarsinnaapput.

*Imm. 10.* Najukkani ataatsimiititalianut qinigassanngortittoqanngippat kommunalbestyrelse aalajangiisinnaavoq najukkani ataatsimiititaliassanut qinersisoqassanngitsoq.

*Imm. 11.* Kommunalebestyrelsip nakkutigissavaa najukkani ataatsimiititaliat ingerlatsinerminni malittarisassat inatsimmi matumani pisortallu ingerlatsinerannut maleruagassani allani allassimasut naapertorlugit ingerlatsinerat.

#### *Ataatsimut aalajangersakkat*

**§ 33.** Kommunalebestyrelse §§ 24-imi aamma 25-imi killiliussat iluanni aqutsinermut maleruagassami aalajangersaasinnaapput ataatsimiititaliaqarnermiit allaanerusumik aqutseriaaseqarnissamik.

**§ 34.** Kommunalebestyrelse ataatsimiititaliaqarnikkut aqqqissuussaannerup allanngortinneqarneranut atatillugu aalajangiisinnaavoq

- 1) ataatsimiititalianik ataavartunik pilersitsissalluni imaluunniit atorunnaarsitsissalluni,
- 2) ataatsimiititaliap ataaavartup ilaasortaasa amerlassusii allanngortinneqassasut imaluunniit
- 3) ataatsimiititaliat ataavartut akornanni suliasat agguataarnerat allanngortinneqassasut.

*Imm. 2.* Ataatsimiititaliaqarnikkut aqqqissuussaannerup allanngortinnerani imm. 1-imi taaneqartutut ingerlanneqassapput kommunip aqutsinissamik ileqqoreqqusaata allanngortinneqarnissaa pillugu § 1, imm. 2-mi maleruagassat malillugit.

*Imm. 3.* Ataatsimiititaliaqarnikkut aqqqissuussaannerup allanngornerani kommunalebestyrelsimut ilaasortap ataatsip piumasarippagu, aningaasaqarnermut ataatsimiititaliami ataavartumillu ataatsimiititaliani tamani inissitsiterisoqaaq.

**§ 35.** Kommunalebestyrelsimut ilaasortat pisussaapput ataatsimiititalianut il.il. qinigaanitik akuerissallugit, tak. §§ 24, 26, 31 kiisalu 32, aammalu suliasat allat kommunalebestyrelsip akuersineratigut suliareqquneqartut.

**§ 36.** Ataatsimiititalianut il.il. ilaasortassanik marlunnik amerlanerusunilluunniit qinersinermi qanoq amerlassuseqarneq tunngavigalugu qinersineq atorneqassaaq ataatsimiititalianut tamanut.

*Imm. 2.* Ataatsimiititalianut il.il. borgmesterip pinngitsoorani ilaasortaaffigisassanut ilaasortassanik qinersinermi borgmesterip pinngitsoorani inigisaa inissanut qanoq amerlassuseqarneq tunngavigalugu

kommunalbestyrelsimi suleqatigiit borgmesterip ataffigisaata pisassaanut ilanngullugu naatsorsuutigineqartassaaq.

*Imm. 3.* Ataatsimiititalianut il.il. ilaasortassanik kommunalbestyrelsimut ilaasortat ilaasortaanngitsullu akornanni qinersisoqassagaangat ilaasortat kommunalbestyrelsip toqqagassai tamarmik qinerneqassapput qanoq amerlassuseqarneq tunngavigalugu ataatsimiititalianut tamanut. Suleqatigiit ilaasortaataqartussat tulleriiaarlutik kommunalbestyrelsimut ilaasortat ilaasortaanngitsullu toqqartussavaat inissat tamarmiusut inuttalernerqarnissaasa tungaanut.

*Imm. 4.* Qanoq amerlassuseqarneq tunngavigalugu qinersineq ingerlanneqassaaq d'Hondtip periaasia tunngavigalugu imaattunik malittarisaaqluni: Kommunalbestyrelsip ilaasortai immikkoortunut qinersinissami pineqartumi qanoq taaseqatigiikkumanertik pillugu siulittaasumut nalunaarsimanertik tunngavigalugu avinneqassapput. Suleqatigiit tamarmik amerlassusii 1-imik, 2-mik, 3-mik il.il. agguarneqassapput. Inernerit pissarsiarineqartut aalajangissavaat qanoq tulleriinneqarlutik sinniisorisassaminnik qinersisinnaanersut. Ilaasortassat kingullerpaat marluk amerlanerilluunniit naligiippata makitsinikkut ilaasortanngortinneqassapput. Suleqatigiit ataasiakkaat sinniisorisassaasa amerlassusissaat aalajangerneqarpat suleqatigiit piaartumik borgmesterimut nalunaarutigissavaat inuit kikkut inissani pisassaminni toqqarneqarnersut. Suleqatigiit arlaata ataatsimik arlalinnilluunniit inuttaliisinnaatitaanini atorumanngippagu inissat inuttalernerqanngitsut suleqatigiit allat akunneranni agguarneqassapput periaaseq siuliani taaneqartoq malillugu.

**§ 37.** Amerlanerussuteqartitsilluni qinersinermi qinigassanngortittoq ilaasortanit najuuttunit qinersinerisa affai sinnerlugit taaneqartoq qinigaassaaq. Qinigassanngortittuni amerlanerussuteqartoqanngippat nutaamik qinersisoqaqqissaaq. Qinersineq taanna amerlanerussuteqavinnermik pilersitsinngippat qinigassanngortittut amerlanernit taaneqartut marluk akornanni pingajussaanik qinersisitsisoqassaaq. Qinersinermi taasinerit naligiissimappata makitsinikkut aalajangerneqassaaq.

*Imm. 2.* Kommunimi sulilersussamik atorfinitsitsinermi qinnuteqartut arlallit akornanni toqqaasoqartassaaq periaaseq imm. 1-imi taaneqartoq malillugu.

**§ 38.** Piffissap qinigaaffiup ingerlanerani ataatsimiititaliami taamaaqataaniluunniit ilaasortaq tunuarpat kommunalbestyrelsimilu suleqatigiinnit aalajangersimasunit qinerneqarsimappat inissaq inueruttoq suleqatigiinnit taakkunannga inuttalernerqassaaq.

*Imm. 2.* Ataatsimiititaliami ilaasortaq najuussinnaanngippat suleqatigiit ilaasortamik qinersisimasut aalajangersinnaapput ilaasortap sinniisussaa, tak. § 15, imm. 2, ataatsimiititaliami ilaasortaagallassasoq ilaasortap najuuteqqilernissaata tunngaanut.

**§ 39.** Ataatsimiititaliamit aalajangerneqartassaaq ilaasortaq imatut soqutigisaqarnersoq, ilaasortaq ataatsimiititaliap suliamik suliarinninnerani peqataasinnaanani.

*Imm. 2.* Ilaasortap ataatsimiititaliami siulittaasoq ilisimatittassavaa pissutissaqarpat suliani aalajangersimasuni suleqataasinnaanerni minut apeqqutinngortitsisinnaasunik.

*Imm. 3.* Ilaasortap suliamut aalajangersimasumut sammitillugu suleqataasinnaanera apeqquserneqarsinnaasorineqarpat kommunalbestyrelsimut gruppe-mi qinigaaqatigisimasaani ilaasortat, aammalu ilaasortaq kisimiilluni qinigaasimasuuppat, suleqataasinnaanera apeqquserneqartup nammeneq

sinniisussamik ataatsimiititaliap sulineranut aggersaasoqarnissaaq piumasaqarsinnaavoq.

*Imm. 4.* Ataatsimiititaliaq ilaasortap suleqataasinnaannginneranik aalajangiippat, sinniisussamik aggersaasoqarsimanngitsoq, taava kommunalbestyrelsimut ilaasortat pineqartup qinigaatigisimasaasa, aamma pineqartut kisimiilluni qinigaasimappat, ilaasortaq nammineq, piumasaqarsinnaapput suliaq tulliani ataatsimiinnissamut kinguartinneqassasoq. Kinguartitsisinnaanerli periarfissaqassanngilaq kinguartitsinerup kingunerissappagu piffissaliussat kommunip pisussaaffigisaasa eqqortinneqarsinnaannginnerat.

**§ 40.** Ataatsimiititaliami ilaasortaq kommunimi ingerlatsivimmik ataatsimiititaliamit pineqartumit qullersaaffigineqartumik akissarsiaqaatigalugu sulissussissanngilaq, tamanna sioqqullugu tamanut ammasumik suliariumannittussarsiuussisoqareersinnagu imaluunniit pissutsit immikkut ittut pissutigalugit kommunalbestyrelse aalajangiisimappat.

*Imm 2.* Ataatsimiititaliami ataavartumi ilaasortaaneq ajornarpoq:

- 1) atorfilinnut, ataatsimiititaliap ataavartup ataani ingerlatsivimmi pineqartumi akisussaasutut aqutsisuusunut,
- 2) atorfilinnut sinniisinut, ataatsimiititaliap ataavartup ataani ingerlatsivimmi pineqartumi akisussaasutut aqutsisuusunut, imaluunniit
- 3) atorfilinnut, ataatsimiititaliap ataavartup ataani ingerlatsivimmi allaffissornermi suliaqarfinnut aqutsisuusunut.

*Imm 3.* Aningaasaqarnermut ataatsimiititaliamut ilaasortaaneq ajornarpoq:

- 1) atorfilinnut, kommunimi ingerlatsiviit ilaanni suliaasaqarfinnik Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaanni § 25 malillugu aningaasaqarnermut ataatsimiititaliamut suliaassanngortitaasunik allaffissornikkut aqutsinermik suliaqarfusuniittuni,
- 2) atorfilinnut, akisussaasutut imaluunniit allatut pisortaasutut ingerlatsivimmi inissisimagaanni, aningaasaqarnermut ataatsimiititaliamut attuumassuteqartuni, aamma
- 3) atorfilinnut, ingerlatsivimmi ingerlatsisuusunut akisussaasutut pisortaagaanni, ataatsimiititaliat ataavartut ataanni.

*Imm 4.* Kinaluunniit kommunalbestyrelsimi atorfeqartitaasumut katissimallugu imaluunniit katissimanngikkaluarlugu inooqateqartumut aappaasoq ilaasortaasinnaanngilaq

- 1) ataatsimiititaliami ataavartumi, atorfeqartoq imm. 2 naapertorlugu ataatsimiititaliami ataavartumi ilaasortaasinnaanngippat, imaluunniit
- 2) aningaasaqarnermut ataatsimiititaliami, atorfeqartoq toqqaannartumik akisussaasuuppat imaluunniit pisortaaqataappat ingerlatsivimmi aningaasaqarnermut ataatsimiititaliamut imaluunniit ataatsimiititaliamut ataavartumut attuumassuteqartumi.

## **Kapitali 5**

### *Nunaqarfinni aqutsisut*

**§ 41.** Nunaqarfinni aqutsisut ataatsimoorussat aamma nunaqarfinni aqutsisut ilaasortanik 3-nik imaluunniit 5-inik amerlassuseqarput. Tamanna pillugu kommunalbestyrelsip aalajangernera pissaaq nunaqarfinni aqutsisussanik ukioq qinersiviusussaq sioqqullugu, ukiup naannginnerani.

*Imm. 2.* Inissitsiterfusumik ataatsimiinnermi siulliullugu Nunaqarfinni aqutsisut akunnerminni siulittaasussaminnik qinersissapput. Nunaqarfinni aqutsisut siulittaasuat piffissamut nunaqarfinni aqutsisut qinigaaffiannut qinnerneqartassaaq.

*Imm. 3.* Nunaqarfinni suliaasat aqunneqassapput nunaqarfinni aqutsisunit kommunalbestyrelsiniit pisinnaatitsineq tunngavigalugu, aammalu qinnerneqartassallutik kommunalbestyrelsinit nunaqarfinni aqutsisunit ilagiillu sinniisaannut qinersisarnermut inatsisartut inatsisaat tunngavigalugu.

**§ 42.** Nunaqarfinni aqutsisut suleriaasianni maleruagassat uku kommunalbestyrelsimit aalajangersarneqassapput: Nunaqarfinni aqutsisut suleriaasissaat. Maleruagassat kapitali 2-mi aalajangersarneqartut ukununga tunngasut saneqqunneqarsinnaanngillat:

- 1) allaganngorlugit imaqarnilianik suliaqartussaannermut pisussaaffeqarneq,
- 2) suliani aalajangersimasuni attuumassuteqarneq pissutigalugu peqataasinnaannginneq imaluunniit
- 3) imaqarniliani ikinnerussuteqartutut oqaaseqaateqarsinnaatitaaneq.

*Imm. 2.* Kinaluunniit nunaqarfiup allaffiani atorfeqartoq nunaqarfinni aqutsisunit ilaasortaasinnaanngilaq.

*Imm. 3.* Nunaqarfinni aqutsisunit ilaasortaasup kialuunniit suliaq ingerlasoq unitsissinnaavaa, ataatsimiinnermi nalunaarutigalugu suliaq pineqartoq kommunalbestyrelsimut imaluunniit kommunimi ataatsimiititaliamut nunaqarfinni aqutsisut sinnerlugu sullitaannut suliaq saqqummiunneqartussanngortillugu.

**§ 43.** Nunaqarfinni pissutsinut tunngasut pillugit nunaqarfinni aqutsisut kommunalbestyrelsimut inassuteqarsinnaapput. Kommunalbestyrelsip sapinngisamik nunaqarfiup suliannut tunngasunut pillugit nunaqarfinni aqutsisut oqartussaaffigeriinngisaminni apequtini oqaaseqartinneqartassapput.

**§ 44.** Kommunalbestyrelsimit aningaasaliissutaareersimanngitsunik nunaqarfinni aqutsisut aningaasartuuteqarsinnaanngillat.

*Imm. 2.* Kommunalbestyrelse aningaasanut missingersuusiani aningaasanik immikkoortitsissaaq nunaqarfinni aqutsisut nammineerlutik aalajangiinnerminni atugassaanik makkunani:

- 1) Kulturimut inunnillu paasisitsiniaanermut.
- 2) Timersornermut tunngasunut.
- 3) Teknikkikkut ingerlatsivinnut pilersuiner Mullu.
- 4) Nunaqarfinni inuutissarsiutinut tunngasunik suliniutinut.
- 5) Innuttaasunut sammisassaqtitsineq.

*Imm. 3.* Aningaasat atugassanngortinneqarsimasut qanoq atorneqarsimanerannut takussutissatut nunaqarfinni aqutsisut kommunalbestyrelsimut nassiuttassavai ikinnerpaamik qaammammut ataasiarluni akiligassanut, bankimut karsimullu pappiaqqat, aningaasat qanoq atorneqarsimanerannut uppersaattut.

**§ 45.** Nunaqarfinni aqutsisut siulittaasuata nakkutigissavaa nunaqarfiup suliaasaatai nunaqarfinni aqutsisut suleriaasaat aammalu pisortatigut maleruagassat atuuttut naapertorlugit ingerlanneqarnersut.

*Imm. 2.* Kommunalbestyrelsip nakkutigissavaa nunaqarfinni aqutsisut ingerlatsinnerminni malittarisassat

inatsimmi matumani pisortallu ingerlatsinerannut maleruagassani allani allassimasut naapertorlugit ingerlatsinerat.

**§ 46.** Kommunalbestyrelsip nunaqarfimmi aqutsisunut ilaasortat akissarsiaqartissavai Naalakkersuisut § 56, imm. 6 naapertorlugu aalajangersagaasa annerpaaffissaatitaasut iluanni.

*Imm. 2.* Kommunalbestyrelsip aalajangersinnaavaa nunaqarfimmi aqutsisut siulittaasui aningaasat amerlanerpaaffissaat Naalakkersuisunit aalajangersakkat sinnernagit ilassutitut aningaasarsiaqartinniarlugit, tak. § 56, imm. 6.

*Imm. 3.* Naartunermi, erninermi meeravissiartaarnermilu Inatsisartut inatsisaat naapertorlugu nunaqarfinni aqutsisut akissarsiaminik annaasaqaataanngitsumik sulinngiffeqarsinnaatitaapput.

## **Kapitali 6**

### *Nakkutilliineq*

**§ 47.** Naalakkersuisut nakkutigissavaat kommunalbestyrelsit ingerlatsinerminni inatsimmi matumani malittarisassat malinneraat, aammalu pisortani maleruagassat atuuttut naapertorlugit ingerlatsinersut.

*Imm. 2.* Naalakkersuisut nakkutilliissanngillat immikkut naammagittaalliuteqartarfiit nakkutilliisuutitallu aalajangiiffigisinnaasaanni suliaasuni.

*Imm. 3.* Naalakkersuisut nakkutilliissanngillat atorfnititsisarnermut maleruagaasunik eqqortitsisoqarnerseq pillugu.

**§ 48.** Kommunalbestyrelsip isumagissavaa Naalakkersuisunullu nalunaarutigalugu kommunimut tunngatillugu paasissutissat Naalakkersuisut piumasaasa ingerlatinneqartarnissaat.

*Imm. 2.* Naalakkersuisut kommunalbestyrelse pisussaatisinnaavaat nassuiaatinik kukkunersuiisuniit kommunalbestyrelsip aalajangigaat kukkunersuiisut nalunaarutaat pillugit pissarsiniaqqullugit.

*Imm. 3.* Naalakkersuisut piffissaliisinnaapput imm. 1-mi aamma imm. 2-mi naapertorlugu paasissutissat pissarsiarineqarnissaannut tunngatillugu.

*Imm. 4.* Naalakkersuisut nakkutilliisutut sulinerminnut atatillugu, sulinermi pappilissanik tigusaqarunik, pisortat ingerlatsineranni suliassat sularineqartarnerat pillugu Inatsisartut inatsisaanni aamma pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni aalajangersakkat naapertorlugit nipangiussimaneqartussatut isigineqartunik, taava pappiliat pineqartut ingerlateqqinneqarnerisigut isertuussaajunnaarsinneqassanngillat.

*Imm. 5.* Naalakkersuisut pisortat ingerlatsivii allat piumaffigisinnaavaat suliassaqarfimmi iluini siunnersuullutillu ikiuteqqullugit, nakkutilliinerup naammassiniarneranut pisariaqartumik.

**§ 49.** Naalakkersuisut aalajangissavaat naammattumik tunngavissaqarnerseq suliap Nakkutilliisoqarfimmut ingerlateqqinnissaanut.

### *Nakkutilliisoqarfik*

**§ 50.** Nakkutilliisoqarfimmi ilaasortaassapput:

1) Siulittaasq, inatsisilerituutut sulinissamut soraarummeersimasq, aammalu Kalaallit Nunaanni Nunap

eqqartuussisuuneranit toqqarneqartoq.

2) Ilaasortat marluk Inatsisartunit Inatsisartunut qinersisoqareernerit tamaasa toqqarneqartussat.

3) Ilaasortat marluk kommunini qinersisoqareernerit tamaasa kommunalbestyrelsimut Ilaasortat akornannit kommuninit ataatsimoortunit toqqarneqartut.

*Imm. 2.* Ilaasortat tamarmik ikinnerpaamik ataatsimik sinniisissaqassapput, ataatsimiigiaqqullugit aggersarneqarsinnaasunik Ilaasortaasup pisinnaannginnerani. Siulittaasumut sinniisissaq inatsisilerituutut sulinissamut soraarummeersimassaaq.

*Imm. 3.* Inissat inuttaarutsillugit Ilaasortassat sinniisussallu nutaat toqqarneqartassapput.

*Imm. 4.* Naalakkersuisut Nakkutilliisoqarfimmi Ilaasortassanik sinniisussanillu toqqaanissamut maleruagassiorsinnaapput.

**§ 51.** Nakkutilliisoqarfik ataatsimiittassaaq siulittaasup imaluunniit Ilaasortat pingasut pisariaqartitsinerat tunngavigalugu.

*Imm. 2.* Siulittaasup qaqugukkut sumilu ataatsimiittoqarnissaa aalajangertassavaa Ilaasortallu ataatsimiigiaqqullugit.

*Imm. 3.* Siulittaasup ataatsimiinnissat sioqqullugit sapinngisamik annertunerpaamik Ilaasortat ataatsimiinnermi oqaluuserisassat pillugit ilisimatittassavai.

*Imm. 4.* Siulittaasup Nakkutilliisoqarfiup ataatsimiinneri siulersortassavai, isumagissallugulu aalajangikkat imaqarniliamut allanneqarnissaat, ataatsimeereernermilu Ilaasortanit ataatsimeeqataasunit imaqarniliap atsiorneqarnissaa. Ilaasortat tamarmik pisinnaatitaapput allaanerumsumik isummernitik imaqarniliamut nalunaarsortissallugit.

**§ 52.** Nakkutilliisoqarfik aalajangiisinnaatitaavoq minnerpaamik siulittaasup saniatigut Ilaasortat marluk ataatsimiinnermi najuuppata.

*Imm. 2.* Aalajangernerni amerlanerussuteqarneq atorneqassaaq. Taasinnermi taasisut naligiippata, siulittaasup taasinera aalajangiisuussaaq. Nakkutilliisoqarfimmi Ilaasortat tamarmik pisinnaatitaapput aalajangernerit unitsissinnaallugit, imaqarniliamullu allatsillugu suliaq Naalakkersuisunut aalajangiiffigisassanngorlugu ingerlateqqinneqassasoq.

*Imm. 3.* Ilaasortaq Nakkutilliisoqarfiup isumaqatigiinniarnerni taasineranilu peqataasinnaanngilaq, suliaq kommunimut Ilaasortap Ilaasortaaffigisaanut tunngasuuppat.

**§ 53.** Siulittaasup Nakkutilliisoqarfiup aalajangigaasa piviusunngortinneqarnissaat isumagissavaa. Siulittaasup Nakkutilliisoqarfik sinnerlugu suliasat kinguartinneqarsinnaanngitsut imaluunniit nalorninaateqanngitsut aalajangiiffigisinnaavai.

*Imm. 2.* Siulittaasup aalajangiineri ataatsimiinnermi tullermi Nakkutilliisoqarfimmut tusaatissatut saqqummiunneqassapput.

*Imm. 3.* Naalakkersuisut Nakkutilliisoqarfiup allattoqarfeqarnissaa isumagissavaat.

**§ 54.** Nakkutilliisoqarfiup sulineranut atasumik aningaasartuutit Nunatta karsianit akilerneqassapput.

**§ 55.** Nakkutilliisoqarfiup kommunalbestyrelsip, aningaasaqarnermut ataatsimiititaliap aammalu ataatsimiititaliat ataavartut aalajangigaat atorunnaarsissinnaavaat, aalajangerneq inatsisinut



unioqqutitsineruppat.

*Imm. 2.* Suliap sularinerani aalajangerneq pineqartoq Nakkutilliisoqarfiup atorunnaarsikkallarsinnaavaa. Aalajangernerli piviusunngortinneqareersimappat, taava taanna taamaallaat atorunnaarsikkallarneqarsinnaavoq:

- 1) suliame susassaqartup arlaata Nakkutilliisoqarfimmut allakkatigut piumasaqaateqarneratigut mianerisassallu annertuut, pingaartumik inuttut soqutigisat tamatumunnga akerliusumik aporfunngippata, imaluunniit
- 2) inatsisiliornerup allatigut naammagittaalluteqarnissaq periarfissaqartinngippagu mianerisassallu annertuut, pingaartumik inuttut soqutigisat tamatumunnga akerliusumik aporfunngippata.

## **Kapitali 7**

### *Akissarsiat*

**§ 56.** Kommunalbestyrelsimut ilaasortanut aalajangersimasumik akissarsiaqartitsisoqartassaaq. Ilaasortat akissarsiaannut ilaapput:

- 1) kommunalbestyrelsip ataatsimiinnerini peqataanermut kommunalbestyrelsimilu ataatsimiititaliani ataatsimiinnernut taakkulu ataani ataatsimiititaliani ataatsimiinnerni peqataanerit,
- 2) kommunalbestyrelsinut qinersereernerup kingorna kommunip sullinneranut atasunut ataatsimiinnernut, allanik aalajangersakkanik immikkut tunngaveqartumik akissarsiaqartitsisoqanngippat,
- 3) pikkorissarnermut peqataanermut, kommunalbestyrelsimut imaluunniit aningaasaqarnermut ataatsimiititaliamit kommunalbestyrelsimiit pisinnaatinneqarneq naapertorlugu sulinermut pingaaruteqartutut isigineqartuni, nr. 1-imi 2-milu suliap pineqartut tunngavigalugit,
- 4) isumasioqatigiinnernut peqataanermut,
- 5) kukkunersuiusut nalunaarutaata saqqummiunneqarnerani peqataanernut,
- 6) kommunalbestyrelsimut imaluunniit ataatsimiititalianiit piumaffigineqarnerit tunngavigalugit kommunimi sulianik ingerlatsinerit aamma
- 7) suliagarnerit allat nr. 1-imiit 6-imut ataatsimiinnerit taaneqartut il. il.

*Imm. 2.* Kommunalbestyrelsip aalajangersinnaavaa kommunimi ataatsimiititaliani ataavartuni siulittaasunut ilassutitut akissarsiaqartitsinissaq.

*Imm. 3.* Kommunalbestyrelsimut ilaasortamut sinniisutut isertoq aalajangersimasumik akissarsiaqartinneqassaaq piffissami kommunalbestyrelsimi suliffigisamini piffissaq pineqartoq minnerpaamik qaammatinik marlunnik sivilussuseqarsimappat. Assigisaanillu ilaasortaajunnaarallartup akissarsiai ilanngarneqassapput, piffissaq pineqartoq minnerpaamik qaammatinik marlunnik sivilussuseqarpat.

*Imm. 4.* Kommunalbestyrelsimut ilaasorta qammatinik marlunnik sivilussusilimmik ataatsimiititaliami ataavartumi siulittaasuugallartoq ilassutitut akissarsiaqartinneqassaaq imm. 2 naapertorlugu. Assigisaanillu ataatsimiititaliami siulittaasuujunnaarallartup ilassutitut akissarsiai ilanngaatineqassapput, ataatsimiititaliami siulittaasoq pineqartoq qaammatit marluk sinnerlugit peqanngitsussaappat.

*Imm. 5.* Kommunimi qinikkatut sulinermut atatillugu Naalakkersuisunit aalajangersakkat naapertorlugit angalanernut najugaqarnernullu ajunngitsorsiaqartitsisoqarsinnaavoq angerlarsimaffimmiit qimagusimasariaqartarnermut matussutaasunik.

*Imm. 6.* Naalakkersuisut aalajangersimasunik akissarsiassaasunik, ilassutitut akissarsianut, ullormusiat, akissarsianut annaasanut taartisiassat taakkualu tunniunneqartarnerat missingersuusiorneqartarnerallu pillugit maleruagassiorsinnaapput.

*Imm. 7.* Kinaluunniit aningaasarsiassanik kajumissaatisianillu il.il. imm. 1-imiit 5-imut pineqartunik tigusinissaminut pisussaavoq.

*Imm. 8.* Naartunermi, erninermi meeravissiarthaarnermilu Inatsisartut inatsisaat naapertorlugu, kommunalbestyrelsini ilaasortat akissarsiaminik annaasaqaataannngitsumik sulinngiffeqarsinnaatitaapput.

**§ 57.** Naalakkersuisut maleruagassiussapput:

- 1) Borgmesterinut aningaasarsiaqartitsisarneq aamma soraarnerussutisiaqartitsisarneq.
- 2) Borgmesterit tullersortaasa imaluunniit kommunalbestyrelsini ilaasortat, borgmesterip peqanngikkallarnerani borgmesterip suliassanik isumaginnittussanngortitaasut aningaasarsiaqartinneqartarnerat.

*Imm. 2.* Kommunalbestyrelsip Nakkutilliisoqarfimmit akuerineqarluni aalajangersinnaavaa pissutsit § 23, imm. 1 aamma 2-mi pineqartut tunngavigalugit borgmesterip akissarsiassai apparneqassasut imaluunniit atorunnaarsinneqassasut.

*Imm. 3.* Kommunalbestyrelse borgmesterip piumasaqarneratigut eqqartuussiviit aqutugalugit suliassanngortitsisinnaavoq imm. 2 naapertorlugu aalajangerup misilinneqarfigissaanik.

**§ 58.** Naalakkersuisut makkununga tunngasut maleruagassiorfigissavaat:

- 1) Borgmesterinut aamma taakku aapparisaasa qitornaasalu soraarnerussutisiassaannik tunniussisarnissaq.
- 2) Inatsisartuni Naalakkersuisunilu ilaasortat soraarnerussutisiaqartinneqartarnerannut maleruagassat atuuttut assigisaannik borgmesterit soraarnerussutisiaqarnernissamik inuttut aaqqissuussisivigineqarnissaat.

*Imm. 2.* Inuttut namminerisamik soraarnerussutisiaqalernissamut aaqqissuussivigineqarsinnaanissamik maleruagassat, tak. imm. 1, nr 2, 2013-imi maajip aallaqqaataani taassumaluunniit kingorna borgmesterinnngortunut atuutissapput. Maleruagassalli taakku borgmesterinut, Kommunit aqunneqarnerat pillugu Inatsisartut inatsisaanni nr. 22-mi, 18. november 2010-meersumi, Inatsisartut inatsisaatigut nr. 6-ikkut, 29. november 2013-imeersukkut allanngortinneqartumi § 67 a, imm. 3 naapertorlugu borgmesterinut namminerisamik soraarnerussutisiaqalernissamut aaqqissuussinermik atuiniaratik aalajangertunut atuutissanngillat.

**§ 59.** Kommunimi sulisut nalinginnaasumik akissarsiaqartitaanerinut, atorfeqartitaanerinut, soraarnerussutisiaqartitaanerinullu aalajangersakkat, inatsisini tamakku aalajangersarneqarsimatinngit, Naalakkersuisut aamma kommunit akunneranni isumaqatigiissutit aqutugalugit imaluunniit isumaqatigiissuteqareernerisigut aalajangersarneqassapput.

*Imm. 2.* Naalakkersuisut kommunimi sulisunut nalinginnaasumik aningaasarsiatigut, atorfeqartitaanikkut soraarnerussutisiassaqartitaanikkullu atugassarititaasut piviusunngortinneqarnissaannut malittarisassanik aalajangersaasinnaapput.

**§ 60.** Nakkutilliisoqarfimmi ilaasortat akissarsiaqartinneqassapput Inatsisartuni Naalakkersuisunilu ilaasortat il. il. akissarsiaqartinneqartarnerannut il.il. Inatsisartut inatsisaat naapertorlugu.

## **Kapitali 8**

### *Iliusereriikkanut kinguneqartitsinerit taarsiissuteqarnerillu*

**§ 61.** Kommunalbestyrelse inatsisit naapertorlugit pisussaaffimminik naammassinninngippat, Nakkutilliisoqarfiup kommunalbestyrelsimut ilaasortat ataasiakkaat pisunut akisussaasut pinngitsaaliissutinik akilersuisussanngortissinnaavai.

*Imm. 2.* Nakkutilliisoqarfik kommunalbestyrelsimut ilaasortamut taarsiissuteqarnissamik piumasaqaateqarsinnaavoq, kommunip annaasaqarluni ajunaaruteqarneranut akisussaasuuppat.

*Imm. 3.* Nakkutilliisoqarfiup suliassanngortitsinini utertissinnaavaa, ilaasortaq pineqartoq piffissaliussap aalajangersimasup iluani aningaasanik aalajangersimasunik kommunimut akiliippat. Akiliutaasussap aalajangersarneqarnerani pisuussutsip annertussusia, ajoqusiinerup annertussusia pissutsillu allat mianeralugit tunngavigineqarsinnaapput. Ilaasortap akiliisussaani akuerippagu aammalu piffissaliussap iluani akiliutaasussaq akilerlugu, taava allatigut pineqartumut taarsiissuteqartoqarnissaanik piumasaqartoqarsinnaanngilaq.

*Imm. 4.* Ilaasortaq taaseqataanngitsoornermigut akisussaaffimminik qimarratiginnissinnaanngilaq.

**§ 62.** Kommunalbestyrelsimut ilaasortaq taarsiissuteqartoqarnissaanik suliaqartoqarnerani annaasaqarluni ajunaarutinit taarsiissuteqartussatut akisussaatinneqarpat, kommunimit sulissussinermini pilarisimasaminik, taarsiissutissap annertussusissaa naapertuuttumik annikillineqarsinnaavoq imaluunniit atorunnaarsinneqarsinnaavoq, pisuussuseqarneq, ajoqusiinerup annertussusia pissutsillu allat mianerineqartussat tunngavigalugit.

**§ 63.** Kommunalbestyrelsimut ilaasortaq kommunalbestyrelsimut ilaasortatut pisussaaffimminik sakkortuumik sanioqqutitsisoq pinngitsaaliissummik akiliisussanngortinneqarsinnaavoq.

*Imm. 2.* Assuarliut imm. 1 naapertorlugu pisoq taamaallaat Nakkutilliisoqarfiup piumasaqarneratigut pisinnaavoq.

## **Kapitali 9**

### *Atuutilersitsinermut aalajangersakkat*

**§ 64.** Inatsisartut inatsisaat ulloq 1. januar 2018 atuutilissaaq.

*Imm. 2.* Peqatigitillugu Kommunit aqunneqarnerat pillugu Inatsisartut inatsisaat nr. 22, 18. november 2010-meersoq atuukkunnaarsinneqarpoq.

*Imm. 3.* Nalunaarutit kommunit aqunneqarnerat pillugu Inatsisartut inatsisaannik atuuttuni tunngaveqartut atuutiinnassapput matumani inatsimmi allanngortinneqarnissamik imaluunniit atorunnaarsinneqarnissamik tungaannut.

*Namminersorlutik Oqartussat, ulloq 17. november 2017*

Kim Kielsen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut